

Uut het
Stellingwarver
boerenleven



UUT ET STELLINGWARVER BOERELEVEN

(Personen : Klaos, een boer, Lammegien, zien vrouw, en Lamert, een buurman; ze bin alleger omdebij viefstig jaor. Teniel : een boerekaamerkeuken; de boer lest de kraante (De Ni'je Ooststellingwarver), zien vrouw zit te breien of dot eer huushoedelik wark)

- Klaos** (lat de kraante wat zakken en zit veur him uut te steren)
- Lammegien** Wat now Klaos, waar lig ie mit de schute ?
- Klaos** Och, nargens.
- Lammegien** Schiet mi'j wat mit jow nargens ! Docht ie, da'k al niet lange in de smiezen har, daj' weer zitten te prakkezeren ? De lippe op 't dadde knoopsgat en toe-kieken al haj' een slag mit de maelpoede had. Ston d'r weer wat in de kraante, wat jow niet zinnigt ?
- Klaos** Nee, dat now niet, mar a'k zo es wat leze, dan daenk ik daor wel geern es effen over nao.
- Lammegien** En waar daenk ie dan disse keer over nao ?
- Klaos** Och, dat wee'k zo niet. 't Het bi'jglieks ok niet veule te beduden.
- Lammegien** Wee'k zo niet ? Wee'k zo niet ? Niks te beduden ? Maek dat de katte wies ! Nee mannegien, ik hebbe 't al lange deur : ie willen weer mit ien van die ni'je fratsen mitdoen en now bi'j an 't rekenen. Of wol ie mi'j wies maeken, dat ie zo zitten te prakkezeren omdat in de kraante staot, dat Fraanke Post van 't jaor ok weer een ram hooft ? Nee joongien, Lammegien lat heur gien oren an de kop ni'jen. Kom d'r mar es mit op 'e lappen. Moet et weer een protte geld kosten ?
- Klaos** Och, dat wee'k zo niet. Mar 't kon wel es een mooie stuver opbrengen.
- Lammegien** Now, dat wodt dan ok tied, want 't gemaek kan de laeste maonden gien pochen lieden. Mar ie maeken mi'j ni'jsgierig. Op wat veur meniere wil mien oolde struuk op zien oolde dag nog hereboer wodden ?

- Klaos** Ja, heb ie de gek d'r mar mit, mar ik gao morgen naor Hes om een vleermoes.
- Lammegien** (slim verheerd) Een vleermoes ha'k docht ! En wol ie daor riek van wodden ? Zwatte keunst of zo wat henne ? Hier !! (wist naor heur veurheufd)
- Klaos** Nee, niet gek, gien zwatte keunst, mar eier ! Eier ! 't Staot in de kraante, dat aj' locht in 't kiepehokke brengen, de kiepen vule foeler beginnen te leggen. En now de eier van 't jaor niet botte priezig binnen, komt et juist op de mennigte an.
- Lammegien** (schuddet et heufd) 'k Zie d'r nog niet veule locht in. Zie eerst mar es, dawwe hier 't elektrisch kriegen !
- Klaos** Stille mar, stille mar, dat komt wel. As d'r nog ien dikke rommelbujje komt, dan is 't een stok henne zo veer.
- Lammegien** Mar wat het dát d'r in de goeiighied now mit te maeken.
- Klaos** Now, d'r het aandere al hiel wat onweer omme west. Mar 't gaot hier bi'j oons krek eers omme as in de netuur : daor locht et eerst en dán dondert et, mar hiér moet et eerst es ommeraek donderen en knette-ren, veurdat et locht.
- Lammegien** O, bedoel ie et zó ! Now, 'k bin bange, dat et dan nog wel een keermennig donderen mag, veurdat et hier bi'j oons op 't voetenaende locht. Mar daor komt Lamert an. Wat zol die veur ni'js hebben ?
- Lamert** (komt binnen zonder te kloppen en zonder dat Klaos of Lammegien overaende komt) 'n Aovend !
- Klaos en Lammegien** (toegelieke) Ok 'n aovend !
- Klaos** Kom, hawwe jów daor es. Now, vaal mar dae en doe mar krek aj' thuis binnen.
- Lamert** (pakt een stoel en gaot naost Klaos zitten) Zo, mit 'n beidend ? Ja, dat gaot zo as 't jonge volkien oolde wodt. 't Is al eers as vroeger. Wi'j zatten altieten bi'j oonze volk thuis te boontiesdoppen of te negenstikken. En awwe zoe'n dikke twintig waren, ien keer in de drie weken naor de meid en ien keer in 't jaor